

Patriarchatus Constantinopolitani. 235

SOZOPOLIS antiquæ Notitiæ Græcæ. *Olimpius* Episcopus Sozopoleos Hæmimontis ciuitatis Pisidiæ Concilio Chalcedonensi subscripsit. Sed an huius sedis Antistes, & mendosè ciuitatis Pisidiæ scribatur, dubium est.

PLOTINOPOLIS Ptol. lib. 3. cap. 11. vulgò *Plondin* teste Nigro. *Hieropylus* huius Episcopus fuisse dicitur apud Socratem lib. 7. hist. Eccles. c. 35.

DEVELTVS colonia Ptol. ibid. Græcis *Deuelto* dicitur vulgò, teste Sophiano, & Bulgaris *Zagoria*, inquit Curopalates. *Ælij Publij Iulij* huius ciuitatis Episcopi meminit Eusebius lib. 5. hist. Eccles. cap. 18. Et *Iouinus* Episcopus Deuelti in Hæmimonte Conc. Chalcedonensi subscripsit.

ANCHIALVS Ptol. ibid. *Sebastianus* Episcopus Anchialensis est in Concilio Constantinop. primo, & *Paulus* in Constantinop. generali V.

PROVINCIA RHODOPES.

TRAIANOPOLIS Ptol. lib. 3. cap. 11. adhuc *Traianopoli*. Huius autem Episcopum Metropolitanum fuisse clare videtur in subscriptionibus Concilij Chalcedonensis, vbi *Basilius* dicitur Traianopolis Metropolis Rhodopes prouinciæ, necnon in Collatione 8. Constantinopolitanæ Synodi generalis quintæ, cui hoc cum nomine subscripsit *Eleusinus*.

MAXIMIANOPOLIS dictæ Notitiæ Græcæ. *Eunepius* eius Episcopus subscripsit Conc. Ephesino, & *Serenus* Chalced. vbi in Rhodope ponitur.

ABDERA Ptol. ibid. vulgò *Polystilo* dicitur, teste Curopalate. Eadem est Ortelio ac Maximianopolis: tamen *Ioannes* Episcopus Abderæ legitur in eodem Concilio Chalcedonensi præter Maximianopolitanum.

MARONIA, postea *Clazomene* dicta Ptolem. ibidem. *Docimatus* Episcopus Maroniæ Rhodopes prouinciæ Thraciæ legitur in Concilio Chalcedonensi ex actis Ephesini, in cuius subscriptionibus etiam reperitur.

ÆNVS Ptol. ibid. *Enio* & *Eno* vulgò dicitur Sophiano teste. *Macarius* Æni Thraciæ Episcopus Concilio Chalcedonensi subscripsit.

CYPSELA Ptol. ibid. *Jpsala* vulgò nuncupatur, teste Io. Leunclauio, & *Capsilar* Bellonio. *Georgius* Episcopus Cypselæ est in Concilio Constantinopolitano generali quinto.

SCYTHIA TRANS DANVBIVM.

SCYTHIAM, quæ trans Danubium est, Thraciæ vt ei vicinam subiungimus. Est autem Scythia, inquit Iustinus, in Orientem porrecta, includitur ab vno latere Ponto, & ab altero montibus Riphæis; à tergo Asia & Phasi flumine. Multum in longitudinem & latitudinem patet. Homi-nibus inter se nulli fines: neque enim agrum exercent, nec domus illis vlla, aut tectum, aut sedes est, armenta & pecora semper pascentibus, & per incultas solitudines errare solitis. Tres in ea sedes Episcopales recenset Notitia antiqua Græca, in qua Zicchia nominatur, quas sic paucis illustrabimus.

CHERSONVS Notitiæ antiquæ Græcæ in Zicchia, quæ in Bosphoro est Gyllio: eadem forte ac Chersonesus Scyllacis in Taurica Chersoneso. *Stephanus* Episcopus Chersoni legitur in Conc. Constantinop. generali quinto.